

## **Oqaluuserisassanut nassuiaat**

(Inatsisartut Siulittaasuat)

Ippassaq ataatsimiinnitsinni oqaluuserisassani immikkoortut 45, 114 aamma 115 angumerinngitsoorparput, taamaattumillu ullumi ataatsimiinnermi oqaluuserineqartussatut ingerlateqqinneqarsimallutik.

Immikkoortumi 45-imi pineqarpoq:

Piginneqatigiilluni inissiat pillugit Inatsisartut inatsisaata allanngortinnissaa pillugu Inatsisartut inatsisaat

(inissiat attartortittakkat allanngortinnerat, kaaviiartitsinissamut inerteqqut il.il.)

Immikkoortumi 114-imi pineqarpoq:

Sulinerimik inuussutissarsiuteqartut sulinerup nalaani ullormut minuttini 30-ni timigissarsinnaatitaallissappata tamatuma namminersorlutik inuussutissarsiuteqartunut pisortanullu aningaasatigut allaffissornikkullu kingunerisassaanik misissuinerimik aallartitsinissamut Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinerimi taamatutaaq tamatuma innuttaasut peqqissusiannut kingunerisassai taamatullu aamma inooriaatsimik pissuteqartumik nappaatit appariarnissaasa naatsorsuutigineqartup malitsigisaaq napparsimalluni sulinngitsoortarnerit Peqqinnissaqarfimmullu aningaasartuutit ikinnerulernerisa inuiaqatigiit aningaasaqarniarnerannut sunniutissai qulaajarneqassapput. Misissuineq UKA 2025 nallertinnagu Inatsisartunut agguanneqassaaq.

Immikkoortumi 115-imi pineqarpoq:

Piffissaq sapaatip akunneranut nalinginnaasumik suliffiusartoq ullumikkut nalunaaquttap akunneri 40-sunit 35-inut appartinneqarpata, tamatuma aningaasatigut, inuiaqatigiinnut peqqissutsikkullu kingunerisassaanik misissueqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuineq UPA 2025 nallertinnagu Inatsisartunut agguanneqassaaq.

## **Taasisarnerit pillugit uku akornanni isumaqatigiissuteqartoqarpoq:**

Jens-Frederik Nielsen, Demokraatit aamma Edvard Nielsen Aronsen, Inuit Ataqaatigiit. Aqqalu C. Jerimiassen, Atassut aamma Doris Jakobsen Jensen, Siumut.